

四庫全書

史部

欽定四庫全書

欽定滿洲源流考卷五

部族五

靺鞨

南北朝

北史靺鞨即古肅慎氏也所居多依山水渠帥

曰大莫弗瞞咄

案滿洲語謂長曰達稱老翁曰薩克達瑪法是大莫弗三字當

係達瑪法也瞞咄二

字與滿珠音相近

括地志靺鞨古肅慎也在東北萬里已下東及北各抵大海

冊府元龜靺鞨在高麗之北其地在營州東二千里南與新羅相接地方二千里編戶十餘萬兵數萬人北齊武成帝河清二年三年俱遣使朝貢後主天統元年至四年武平元年四年六年並遣使朝貢

後周書高麗北鄰靺鞨

隋

隋書靺鞨國在高麗之北邑落各有君長不相

總一凡有七部

詳見前
勿吉條

西北與契丹接每相攻

掠後因其使來高祖謂之曰我憐念契丹與爾
無異宜各守土境豈不安樂何為輒相攻擊使
者謝高祖因厚勞之煬帝初與高麗戰頻敗其
衆渠帥度地稽率其部來歸拜右光祿大夫居
之柳城及遼東之後度地稽率其徒以從每有

戰功十三年從帝幸江都尋令歸柳城在途遇
李密之亂至高陽復沒於王須拔未幾歸羅藝
冊府元龜開皇元年靺鞨遣使貢方物三年十
一年十三年大業十一年並來貢突地稽者靺
鞨之長也大業中與兄瞞咄率其部內屬營州
瞞咄卒代總其衆拜遼西太守封夫餘侯親來
江都屬宇文化及之亂仍歸柳城唐武德二年
通使焉

唐

舊唐書靺鞨蓋肅慎之地後魏謂之勿吉在京

師東北六千餘里其國凡為數十部各有長帥

而黑水靺鞨

按黑水即黑龍江
詳見前勿吉條

最處北方尤稱

勁健父子相承世為君長武德初突地稽遣使

朝貢以其部落置燕州仍以突地稽為總管劉

黑闥之叛也突地稽率所部赴定州遣使詣太

宗請授節度以戰功封著國公

冊府元龜
作者國公又徙

其部落於幽州之昌平城會高開道引突厥來
攻幽州突地稽率兵邀擊大破之貞觀初拜右
衛將軍賜姓李氏尋卒子謹行偉貌武力絕人
麟德中歷遷營州都督其部落家僮數千人以
財力雄邊累拜右領軍大將軍為積石道經畧
大使吐蕃論欽陵等率衆十萬人入寇湟中謹
行兵士採樵素不設備忽聞賊至遂建旗伐鼓
開門以待之吐蕃疑有伏兵竟不敢進上元三

年又破吐蕃數萬衆於青海降璽書勉勞之累
授右衛大將軍封燕國公永淳元年卒贈幽州
都督自後或其長自來或遣使朝貢每歲不絕
其白山部素附於高麗因收平壤之後部種多
入中國汨咄安居骨室等部亦因高麗破後並
為渤海編戶惟黑水部全盛分為十六部開元
十三年安東都護薛泰請於黑水靺鞨內置黑
水軍續更以最大部落為黑水府

按渤海傳作
開元十四與

與此小異

仍以其首領為都督諸部刺史隸屬焉中國置長史就其部落監領之十六年其都督賜姓李氏名獻誠授雲麾將軍兼黑水經畧使仍以幽州都督為其押使自此朝貢不絕

舊唐書百濟傳永徽六年新羅王金春秋表百濟與靺鞨攻其北界沒三十餘城

舊唐書高麗傳貞觀十九年太宗次安市城高麗北部耨薩高延壽等率高麗靺鞨之衆十五

萬來援安市乾封九年分高麗故地置都督府
九又置安東都護府以統之自是高麗舊戶分
授靺鞨

舊唐書鐵勒傳鐵勒國東至靺鞨西至葉護太
宗征高麗鐵勒遣使請發兵助軍高麗莫離支
潛令靺鞨啗以厚利不敢動

新唐書地理志靺鞨州三府三慎州

武德初以
沫沫烏素

固部落置
僑治良鄉

夷賓州

乾符中以愁思嶺
部落置僑治良鄉

黎州

載初
元年

析慎州置僑治良鄉按原文作載黑水州都
初二年考本紀載初無二年今改

督府渤海都督府安靜都督府右初皆隸營州
都督府李盡忠陷營州乃遷慎州於淄青之境
夷賓州於徐州之境黎州於宋州之境神龍初
乃使北還二年皆隸幽州都督府

通典古時肅慎後魏以後曰勿吉唐則曰靺鞨

焉

按靺鞨字作鞨
與諸史異

冊府元龜唐武德五年靺鞨帥阿固即來朝七

年九年貞觀三年並來朝貢五年黑水部獨來
自此每歲朝貢開元元年靺鞨王子來朝請就
市交易入寺禮拜許之二年拂涅靺鞨首領失
異蒙越喜靺鞨首領烏施可蒙鐵利靺鞨首領
闕許離等來朝迄開元天寶之世一歲或二三
至十年拂涅部靺鞨如價鐵利部買取利來朝並
授折衝越喜部茂利蒙鐵利部可婁計黑水部
倪屬利稽來朝並授中郎將十一年越喜部勃

施計勿涅部朱施蒙鐵利部倪處梨來朝並授
郎將十二年鐵利部渙池蒙來朝授將軍越喜
部努布利沸涅部魚可蒙並授郎將黑水首領
屋作箇授折衝越喜部復遣使破支蒙來賀正
旦十三年黑水部遣其將五郎子來賀正授將
軍鐵利大首領封阿利越喜部忒利施拂涅部
薛利蒙來朝黑水大首領烏素可蒙授折衝諾
箇蒙授果毅職訖蒙授郎將十五年鐵利部米

象來朝授即將失伊蒙授果毅十八年黑水部

遣使阿布科思

又作阿
布思利

獻方物倪屬利稽等十

人來朝授中即將拂涅部兀異獻馬四十匹授

左武衛折衝留宿衛二十四年越喜部首領聿

棄計授折衝二十五年拂涅首領兀異授中郎

將二十八年越喜部遣其臣野古利鐵利部遣

其臣綿度戶獻方物二十九年越喜部遣烏舍

利黑水部遣阿布利稽拂涅部遣那棄並來朝

大歷二年至十二年建中八年並遣使朝貢建
中十九年虞婁越喜並來元和十年黑水部長

十一人來

案冊府元龜所載靺鞨人名以滿洲語考之如謂好曰賽音謂能曰莽阿

與夫異蒙音近工於甲者曰烏克紳莽阿與烏施可蒙音近善騎射者曰摩琳莽阿與茂林蒙音近謂努曰努伯哩與努布利音近羽毛豐滿曰豐阿拉與封阿利音近聰明能事曰蘇呼莽阿與薛利蒙音近甚能曰諾凱莽阿與諾箇蒙音近稱弓彎曰密色與米象音近謂柔軟曰烏延與兀異音近傳譯之訛尚有可訂也

冊府元龜唐高宗儀鳳中授高藏為朝鮮郡王

夫餘隆為帶方郡王並遣歸遼東以輯高麗百濟餘衆高藏既至謀叛唐與靺鞨相結召還流邛州其地沒於新羅餘衆散投突厥及靺鞨夫餘隆亦不敢歸舊國土地盡沒於靺鞨高氏夫餘氏君長遂絕上元二年劉仁軌破新羅之衆於七重城又以靺鞨兵浮海而南略新羅之南境斬獲甚衆開元八年九月遣左驍衛郎將攝即中張越使於靺鞨以將討奚及契丹也開元

十二年新羅王弟金忠信上表請攻靺鞨帝許之

太平寰宇記靺鞨在高麗北古肅慎地隋初有使來獻謂即勿吉也唐武德三年部長突地稽遣使朝貢以其部置燕州拜為總管其後黑水部全盛分為十六部落黑水西北有思慕靺鞨正北微東十日程有郡利靺鞨東北十日程有窟說靺鞨亦謂之屈設東南十日程有莫曳皆

靺鞨今黑水靺鞨界南至渤海國德里府北至小海東至大海西至室韋南北二千里東西千里初太宗謂侍臣曰靺鞨遠來蓋突厥降朕所致也其拂涅等部唐初至天寶末亦嘗朝貢或隨渤海國而來惟郡利莫曳皆二部未至

通考唐武德五年靺鞨渠長阿固郎始來太宗貞觀二年以其地為燕州帝伐高麗其北部與高麗合率衆援安市城每戰靺鞨常居前開元

十年其帥倪屬利稽來朝拜勃利州刺史於是置黑水府以部長為都督刺史訖帝世朝獻者十五大厯世凡七貞元一來元和中再初黑水西北又有思慕部益北又十日得郡利部東北行十日得窟說部稍東南行十日得莫曳皆部又有拂涅虞婁越喜鐵利等部其地南距渤海北東際於海西抵室韋南北袤二千里東西千里其後渤海盛皆後屬之

五代

五代史黑水靺鞨本號勿吉當後魏時見中國
其國東至海南界高麗西接突厥北隣室韋蓋
肅慎氏之地也同光二年黑水首領兀兒遣使
者來其後常來朝貢自登州泛海出青州其部

族世次史皆失其紀

按索倫語謂山曰烏呼與
兀兒音同黑水部族至廣

而兀兒所部史失其紀以音
譯考之當與今索倫近也

五代會要黑水靺鞨蓋肅慎之地在京師東北

六千餘里東至於海西接突厥南界高麗北隣
室韋其國凡有十部各有統帥而黑水最處北

方尤稱勁健天成四年八月遣使骨至

按骨至當為郭

濟之訛滿洲語曲指也

來貢方物以骨至為歸德司戈遣

還長興元年二月其首領兀兒復遣使朝貢二
年五月青州奏黑水兀兒部至登州賣馬

冊府元龜後唐同光二年九月黑水國遣使朝

貢三年黑水胡獨鹿

按滿洲語令急速曰呼都拉與胡獨鹿音近

等

遣使朝貢三年青州奏市到黑水馬三十匹

遼

遼史太祖天顯元年靺鞨來貢太宗會同元年

靺鞨來貢

遼史兵衛志屬國軍有靺鞨部朝貢無常有事

則遣使徵兵或下詔令專征助軍多寡各從其

便

遼史地理志唐載初元年

原本作載初二年蓋沿唐志之誤謹改

析慎州

原本慎訛鎮今據唐地理志改

置黎州處靺鞨部落後

為奚人所據遼為榆州

金

金史世紀靺鞨本號勿吉隋稱靺鞨而七部並同唐初有黑水靺鞨粟末靺鞨其五部無聞粟末靺鞨後稱渤海黑水靺鞨居肅慎地東瀕海南接高麗嘗以兵十五萬助高麗拒唐太宗開元中置黑水府賜都督姓李氏名獻誠領黑水

經畧使其後渤海盛強黑水役屬之朝貢遂絕
五代時契丹盡取渤海地而黑水附於契丹其
在南者籍契丹其在北者不在契丹籍地有長
白山黑龍江所謂白山黑水是也

元

元史地理志開元路古肅慎之地隋唐曰黑水
靺鞨其後渤海盛役屬之渤海為契丹所攻黑
水復有其地

謹按靺鞨後魏謂之勿吉其名始見於南北朝
北史合為一傳至隋唐則專為靺鞨傳武德以
後遂無復勿吉之稱其七部即勿吉之七部也
迨後分部愈廣至有數十最强者為粟末黑水
粟末部大氏既興改稱渤海另條詳後靺鞨自後魏
以來邑落各有君長不相統一其與隋唐諸國
使命相通者特其一部一邑即唐時都督刺史
之授亦不過假借虛名以通互市往來之便實

未有能統而一之者後或分屬契丹猶然散處
而黑水一部實在今薩哈連烏拉之境唐時即
已獨盛又自分為十六部至五代時改稱女真
無靺鞨諸部而有之而完顏氏

另條
詳後

世君其地

未嘗一日屬契丹也其部族之可考者若思慕

郡利窟說莫曳皆虞婁越喜鐵利等皆是


案今
黑龍

江將軍所屬有錫呼穆第河有庫裕爾河與思慕
窟說音相近當皆以水得名八旗姓譜中有裕
嚕氏當即虞婁之轉音上溯挹婁亦相近也又
滿洲語謂全部之部曰約希謂隊伍曰默音謂

理曰堅與越喜
莫也皆音亦近

中間渤海盛時亦有侵併至若越
喜故地之為懷遠安遠二府領達越等十三州
鐵利故地之為鐵利府領廣汾府六州而遼地
志載新興縣本越喜國地遼本紀鐵驪國屢通
貢使至天祚不絕是越喜入遼而鐵利復自立
國迄於金世猶存利與驪音同續通考乃云不
知其所始非也虞婁當即挹婁之轉音思慕等
部亦當在今黑龍江左右至唐書言白山部分

散入中國而遼志有長白山女真三十部稱號
雖殊山川可考金源盛而諸部始歸於一焉爾



欽定滿洲源流考卷五

欽定四庫全書

史部

欽定滿洲源流考卷六至九

翰林院編修臣謝墉覆勘

總校官編修臣程嘉謨

欽定四庫全書

欽定滿洲源流考卷六

部族六

渤海

唐

舊唐書渤海靺鞨大祚榮者始居營州萬歲通
天年契丹盡榮叛祚榮與靺鞨乞四比羽各
東奔保阻以自固盡榮既死則天命右王鈐衛

大將軍李楷固率兵討其餘黨先破乞四比羽
又度天門嶺以迫祚榮祚榮合高麗靺鞨之衆
以拒楷固王師大敗楷固脫身還屬契丹及奚

盡降突厥道路阻絕則天不能討祚榮遂率其

衆東保桂婁

新唐書
作挹婁

之故地據東牟山築城以

居之祚榮驍勇善用兵靺鞨之衆及高麗餘燼

稍稍歸之聖厯中自立為振

通考
作震

國王遣使通

於突厥其地在營州東二千里南與新羅相接

東北至黑水靺鞨地方二千里編戶十餘萬勝
兵數萬人中宗即位遣侍御史張行友往招之
祚榮遣子入侍將加冊立會契丹與突厥連歲
入邊使命不達先天二年遣即將崔訢往冊拜
祚榮為左驍衛員外大將軍渤海郡王仍以其
所統為忽汗州加授忽汗州都督開元七年祚
榮卒冊立其嫡子桂婁郡王大武藝十四年黑
水靺鞨遣使來朝詔以其地為黑水州置長史

武藝謂其屬曰黑水途經我境今始與唐家相通舊請突厥吐屯皆即知同去今不計會即請

漢官必是與唐家通謀叛背攻我也遣母弟大

門藝及其舅任雅

新唐書通考皆作任雅相

發兵以擊黑水

門藝曾充質子至京師開元初還國至是謂武

藝曰黑水請唐家官吏即欲擊之是背唐也昔

高麗全盛時強兵三十餘萬唐兵一臨掃地俱

盡今日渤海之衆數倍少於高麗事必不可武

藝不從門藝兵至境又上書固諫武藝怒遣從
兄大壹夏代統兵徵門藝欲殺之門藝遂棄其
衆間道來奔詔授左驍衛將軍武藝上表極言
門藝罪狀請殺之上密遣門藝往安西報武藝
云門藝遠來歸投義不可殺今流向嶺南乃留
其使馮文軌葱勿雅別遣使報之俄有洩其事
者武藝又上書云大國示人以信豈有欺誑之
理今聞門藝不向嶺南請依前殺却帝遣門藝

暫向嶺南以報之二十年武藝遣其將張文休
率海賊攻登州詔門藝往幽州徵兵以討之仍
令太僕員外卿金思蘭發新羅兵以攻其南境
屬寒凍雪深丈餘兵士死者過半無功而還武
藝懷怨不已密遣使至東都假刺客刺門藝於
天津橋南門藝格之不死詔捕獲其賊盡殺之
二十五年武藝卒子欽茂嗣立

新唐書渤海本粟末靺鞨姓大氏高麗滅率衆

保挹婁之東牟山地直營州東二千里南北新
羅以泥河為境東窮海西契丹築城郭以居萬
歲通天中有舍利乞乞仲象者與乞四比羽東
度遼水保太白山之東北武后封乞四比羽為
許國公乞乞仲象為震國公不受命李楷固擊
殺比羽是時仲象已死其子祚榮敗楷固兵乃
自號震國王地方五千里盡得夫餘沃沮弁韓
朝鮮海北諸國先天中拜為左驍衛大將軍勃

海郡王自是始去靺鞨號專稱渤海祚榮卒其
國謚為高王子武藝立斥大土宇東北諸國畏
臣之改年曰仁安卒謚武王子欽茂立改年大
興天寶末欽茂徙上京直舊國三百里忽汗河
之東卒謚文王子宏臨早卒族弟元義立一歲
國人殺之推宏臨子華璵為王復還上京改年
中興卒謚成王欽茂少子嵩鄰舊唐書
作璿立改年
正歷謚康王子元瑜立改年永德謚定王弟言

義立改年朱雀謚僖王弟明忠立改年太始立
一歲卒謚簡王從父仁秀立改年建興其四世

祖野勃

紫野勃當為伊伯之
轉音滿洲語令進也

祚榮弟也仁秀頗

能討伐海北諸部開大境宇有功卒謚宣王子

新德早卒孫彝震立改年咸和卒弟虔晃立虔

晃卒元錫立初其王數遣諸生詣京師太學習

識古今制度至是遂為海東盛國地有五京十

五府六十二州以肅慎故地為上京曰龍泉府

領龍湖勃三州其南為中京曰顯德府領盧顯

鐵湯榮興六州濊故地為東京曰龍原府亦曰

柵城府領慶鹽穆賀四州沃沮故地為南京曰

南海府領沃晴椒三州高麗故地為西京曰鴨

渌府領神桓豐正四州曰長領府

案遼史作長嶺古字相通

考今吉林烏拉城西南五百里有山名長嶺子滿洲語謂之郭勒敏珠敦南接納魯窩集北接庫勒訥窩集自長白山南一嶺環繞至此遂綿亘不絕為眾水分流之地勃海府名當取諸此

領瑕河二州夫餘故地為夫餘府常屯勁兵扞

契丹領扶仙二州鄭頡府領鄭高二州挹婁故

地為定理府領定瀋

遼志作瀋當係此誤

二州安邊府領

安瓊二州率賓故地為率賓府領華益建三州

拂涅故地為東平府領伊蒙陀

通考作陀

黑水五州

鐵利故地為鐵利府領廣汾蒲海義歸六州越

喜故領為懷遠府領達越懷紀富美福和芝九

州安遠府領寧郡慕常四州又郢銅涑三州為

獨奏州涑州以其地涑沫江蓋所謂粟末水也

府州並詳
後疆域門

幽州節度府與相聘問自營平距京

師蓋八千里而遠後朝貢至否史家失傳

考冊
府元

龜渤海朝貢在唐時至
會昌間止今詳於後

冊府元龜唐玄宗先天二年二月封靺鞨大祚

榮為渤海郡王祚榮聖歷中自立為振國王在

營州東二千里兵數萬人至是遣即將崔訢往

冊命祚榮左驍衛員外大將軍渤海郡王仍以

其所統為忽汗州都督自是每歲遣使朝貢開

元七年祚榮卒遣使弔祭立其嫡子桂婁郡王大武藝襲為左驍衛大將軍渤海郡王忽汗州都督八年六月冊武藝嫡男大都利行為桂婁郡王二十年武藝卒其子大欽茂嗣立二十一年渤海靺鞨越海來侵登萊殺刺史韋俊詔新羅王金興光發兵伐之貞元十一年二月令內常侍殷志瞻往渤海冊大嵩璘為郡王嵩璘欽茂之子也十四年三月加大嵩璘銀青光祿大

夫簡校司空冊為渤海國王依前忽汗州都督
嵩璘父欽茂以開元間襲郡王都督左金吾大
將軍天寶中累加特達太子詹事賓客寶應元
年進封國王大歷中又累拜司空太尉及嵩璘
嗣位時但授其郡王將軍嵩璘遣使叙理更加
冊命焉貞元二十一年復加金紫光祿大夫簡
校司徒元和元年加簡校太尉四年嵩璘卒冊
男元瑜為銀青光祿大夫簡校秘書監充忽汗

州都督渤海國王八年元瑜卒以其長弟權知
國務言義襲十三年以知渤海國務大仁秀為
國王十五年加仁秀金紫光祿大夫簡校司空
太和五年以權知國務大彛震襲為國王

冊府元龜唐開元九年渤海大首領來朝十年
遣其大臣味勃計來朝授大將軍十二年遣其
臣賀祚慶來賀正旦十三年遣首領烏借支蒙
來賀正首領謁德來朝授果毅王弟大昌勃價

來朝授左威衛將軍留宿衛十四年渤海王子

大都利行

原文作渤海王大都利考之史傳渤海王實未嘗來朝惟開元八年封王

子大都利行為桂婁郡王蓋渤海之支郡下文亦稱宿衛王子大都利行卒此處係脫二字謹

增

來朝授左武衛大將軍留宿衛王子義信來

朝十五年大昌勃價還國封襄平縣開國男王

弟大寶方來朝十六年宿衛王子大都利行卒

贈特進令有司護歸國首領於夫須來朝授折

衝十七年獻鷹及鰻魚王弟大胡雅來朝授遊

擊將軍留宿衛王弟大琳來朝授中郎將留宿

衛十八年王弟大郎雅來朝賀正大首領使知

蒙獻馬三十匹烏那達初

索烏氏為勒海大姓那達初以滿洲語考

之當為納丹珠之轉音也

來獻海豹皮五貂鼠皮五瑪瑙杯

一馬三十匹十九年國王遣大姓取珍等百二

十人來朝二十三年王弟蕃來朝

冊府元龜藥異門作二十

四年並載授蕃太子舍人

二十五年首領木智蒙公伯計等

來獻鷹鵠二十六年獻豹鼠皮千張乾文魚百

口二十七年王弟大勗進來朝宴於內殿授左

武衛大將軍留宿衛十月使其臣受福子

一作優福

子來謝二十九年遣失阿利來朝天寶二年王

弟蕃來朝留宿衛自天寶迄大歷一歲皆二三

至建中元年三年並來朝貞元七年以賀正使

大常靖為衛尉卿王子大貞幹來宿衛十年以

來朝王子大清真為右衛將軍十四年以王姪

大能信為中郎將元和元年二年四年並遣使

二年進奉端午使楊光信逃歸榆關吏執以至
五年遣其臣高才南及其子大延真來朝七年
御麟德殿宴使臣賜官告三十五通衣各一襲
八年遣辛文德等九十七人九年遣高禮進等
三十七人大孝真等五十九人來朝十年賜使
者郊貞壽大呂慶等告遣王子大庭俊等一百
一人來朝十一年授使人高宿滿等官十二年
十三年十五年長慶二年四年寶厯元年二年

太和元年三年五年並遣使朝貢六年遣王子
大明俊來朝七年遣同中書右平章事高賞英
謝冊命開成元年遣王子大明俊來朝湍青節
度使奏渤海將到熟銅請不禁斷四年遣王子
大延廣來朝會昌六年遣使來朝

五代

五代史渤海本號靺鞨唐高宗滅高麗徙其人
散處中國置安東都護於平壤以統之武后時

契丹攻北邊高麗別種大乞乞仲象與靺鞨長
乞四比羽走遼東分至高麗故地武后遣將擊
殺乞比羽而乞乞仲象亦病卒仲象子祚榮
立因并有比羽之衆其衆四十萬人據挹婁臣
於唐中宗時以為忽汗州都督封渤海郡王其
後世遂號渤海其貴族姓大氏開平元年國王
大諲譔遣使者來訖顯德常來朝貢國土物產
與高麗同諲譔世次立卒史失其紀

五代史契丹附錄契丹欲攻中國患渤海等在其後欲擊渤海懼中國乘其虛乃遣使聘唐以通好明宋遣供奉官姚坤至西樓契丹主方東攻渤海坤追至慎州見之契丹主曰昨聞中國亂欲以甲馬五萬往助我兒而渤海未除志願不遂因攻渤海取夫餘一城以為東丹國

通考與此

同

舊五代史出榆關行砂磧中七八日至錦州又

五六日過海北州又行十餘日渡遼水至渤海
國鐵州又行七八日至南海府天成元年十一
月青州霍彥威奏得登州狀申契丹先發諸部
攻逼渤海自契丹主卒雖已抽退尚留兵馬在
夫餘城今渤海王弟部領兵士攻圍夫餘城契
丹

通鑑同光二年契丹擊渤海之遼東無功而還
天成元年復擊渤海七月拔夫餘城

宋史渤海併有夫餘肅慎等十餘國歷唐梁後

唐朝貢不絕後唐天成初為契丹攻夫餘城下

之攻夫餘為東丹府命其子托雲

舊作突欲

留兵鎮

之契丹主卒渤海王復攻夫餘不能克歷長興

清泰遣使朝貢周顯德初其豪崔烏斯等三十

人來歸其後隔絕不復通

宋會要與此同烏斯當為烏蘇之訛

葉

蒙古語

水也

冊府元龜梁開平元年五月渤海王子大昭順

貢海東物產三年三月渤海王大諲譔遣其相
大誠諤朝貢進人口及貂皮熊皮等乾化元年
遣使來賀二年五月遣王子大光贊進方物後
唐同光二年正月遣王子大禹謨五月遣其姪
元讓並來朝貢三年使臣裴璆貢人參松子昆
布黃明細布貂鼠被一褥六髮靴革奴子二拜
右贊善大夫天成元年四月遣使大陳林等百
十六人進兒口女口三及人參昆布白附子虎

皮等七月使人大昭佐等六人朝貢十一月青
州奏契丹先發諸部攻渤海自契丹主卒雖已
抽退尚留兵夫餘城今渤海王弟部領兵士攻
圍夫餘四年渤海遣使高正詞貢方物長興元
年正月青州奏差人押渤海王憲一行歸本國
被黑水剽劫今得黑水兀兒狀及將印紙一張
進呈二年使人文成角來朝貢三年正月遣使
來朝應順二年十一月遣使列周義入貢

紫後
唐愍

帝應順改元止三月即為懿王清泰元年考五代史載清泰二年渤海遣使者來是應順當係

清泰
之誤

通考後唐同光二年渤海王遣姪學堂親衛大

元讓

原本避宋濮王允讓諱改
讓為謙今據冊府元龜改

來朝授

原本脫
三字今

據冊府
元龜改

試國子監丞三年及天成元年俱遣使

入貢先是契丹太祖兵力雄盛東北諸國多臣

屬之以渤海土地相接常有吞併之意是歲率

諸部攻渤海夫餘城下之改夫餘城為東丹府

命其子托雲鎮之未幾按巴堅

舊作阿保
機今改

死命

其弟率兵攻夫餘城不克而還四年及長興二

年三年四年清泰二年三年俱遣使貢方物周

顯德元年渤海國烏思羅等五十人歸化其後

隔絕不通

宋

宋史太平興國四年太宗平晉陽移兵幽州渤

海首領大鸞河率小校李勛等十六人部族三

百騎來歸以鸞河為渤海都指揮使六年賜烏
舍城浮渝府渤海琰府王詔令助攻契丹九年
春宴大明殿召鸞河慰撫久之謂殿前都校劉
延翰曰俟高秋戒候當與駿馬數十匹令出郊
遊獵以遂其性因以緡錢十萬併酒賜之

案渤海無

浮渝府當即夫
餘府音近而訛

宋會要太平興國六年賜渤海烏舍城清渝府

宋史作
浮渝府

渤海琰府王詔曰聞爾國爰從前代本

是大藩近年以來頗為契丹所制宜盡率部族
來應王師朔漠之外悉以相與渤海大國近來
服役於契丹至是將發師大舉故先告諭俾為
應也淳化二年以渤海不通朝貢令女真發兵
攻之凡斬一級給絹五匹徽宗政和八年五月
臣僚言登州與渤海相望熙寧中巡檢每季下
北海馳基島駐劄以馳基石為界自北朝通好
不曾根理深慮渤海相近作過則馳基塞孤立

乞以末島嗚呼島為界併欽島添置卓望兵令
戍守往來巡邏詔令指畫聞奏不得希功生事
通考定安國宋開寶三年遣使入朝太平興國
中詔其國張倚角之勢同伐契丹六年冬遣使
上表云定安國王烏元明言臣本高麗舊壤渤
海遺黎保據方隅涉厯星紀頃歲契丹入侵境
土攻破城寨俘掠人民臣祖考守節不降與衆
避地僅存生聚以迄於今而又夫餘府昨背契

丹並歸本國災禍將至無大於斯所宜率兵助討必欲報敵其末題云元興六年十月日上答以詔書令其協力同伐契丹端拱二年其王子

獻馬及雕羽鳴鏑淳化二年王子大元上表後

不復至

按烏氏為渤海著姓詳表中所叙當係渤海舊臣保守方隅不肯降遼者烏麗

舊壤在渤海為鴨綠府夫餘復歸事遼史未載

宋薛暎記渡潢水石橋旁有饒州唐於契丹嘗

置饒樂今渤海人居之

遼

遼史本紀太祖神冊二年渤海遣使來貢四年

修遼陽故城以渤海戶實之天贊三年渤海殺

遼州刺史張秀實而掠其民四年十二月親征

大諲譔丁巳次商嶺夜圍夫餘府天顯元年正

月庚申拔之丙寅命特哩袞

舊作惕隱今改

阿敦

舊作安端

今改前北府宰相蕭阿固齊

舊作阿古只今改

等將萬騎

為先鋒遇諲譔老相兵破之是夜大元帥耀庫

濟

舊作堯
骨今改

南府宰相蘇北院額爾奇木

舊作夷
董今改

薩納齊

舊作斜
赤今改

南院額爾奇木迪里

舊作迭
里今改圍

忽汗城卒未諠譟率僚屬三百餘人出降上優

禮而釋之甲戌詔諭渤海郡縣丙子遣近侍康

末怛等十三人入城索兵器為邏卒所害諠譟

復叛攻其城破之駕幸城中諠譟請罪馬前詔

以兵衛諠譟及族屬出帝還軍中二月安邊鄭

頡南海定理等府泊諸道節度刺史來朝慰勞

遣之甲午復幸忽汗城改城名天福改渤海國

為東丹冊皇太子貝為人皇王以主之以皇弟

塔喇

舊作迭利今改

為左大相渤海老相為右大相渤海

海司徒大素賢為左次相耶律伊濟

舊作羽之今改

為

右次相赦其國內三月遣額爾奇木康默記等攻

長嶺

唐書通考俱作嶺

府已已安邊鄭頡定理三府叛

遣阿敦討平之乙酉以大諲譔舉族行五月南

海定理二府復叛大元帥耀庫濟討之七月鐵

州刺史衛鈞反耀庫濟攻拔之八月康熙記等
攻下長嶺府耀庫濟討平諸州太宗天顯三年

遷東丹

即夫餘城

民以實東平其人或亡入新羅女

真五年以渤海戶賜皇弟拉呼

舊作李胡今改

聖宗統

和四年涿州之役渤海小校貫海等叛入於宋

十四年渤海雅必

舊作燕頗今改

等侵鐵驪遣奚王和

碩努等討之不克削和碩努官二十一年四月

渤海部遣使來貢聖宗開泰八年置東京渤海

承奉官都知押班遷寧州渤海戶於遼土二河之間太平八年以渤海宰相羅漢權東京統軍

使九年八月東京實里

舊作舍利今改

軍詳袞

舊作詳穩今改

大延琳囚留守駙馬蕭孝克及南陽公主殺戶

部使韓紹勲等即位號其國為興遼年為天慶

延琳先與副留守王道平謀道平夜踰城與延

琳所遣名黃龍府黃翮者俱至行在告變上即

徵兵進討時蕭丕勒迪

舊作匹敵今改

治近延琳先率

兵據其要害絕其西渡之計渤海太保夏行美

先戍保州延琳密馳書使圖統帥耶律布爾古

舊作蒲
古今改

行美反以實告布爾古遂殺渤海兵八

百人而斷其東路延琳知黃龍保州皆不附遂

分兵西取瀋州節度副使張傑聲言欲降故不

急攻及知其詐而已有備攻之不克而還時南

北女真皆從延琳及諸道兵皆至延琳嬰城固

守命燕王蕭孝穆等攻之十月八月延琳渤海

平詔渤海舊族有勲勞材力者叙用餘分居來

隰遷閏等州天祚帝天慶五年二月饒州渤海

古裕

舊作古
欲今改

等自稱大王以蕭色佛呼

舊作謝
佛留今

改等討之為古裕所敗以南面副部署蕭圖斯

哈

舊作陶蘇
幹今改

為都統赴之五月及古裕戰敗績

丙辰獲古裕等六人正月朔東京裨將渤海高

永昌稱隆基元年閏月貴德州守將耶律伊都

舊作余
觀今改

以廣州渤海附永昌二月張嘉努誘饒

州渤海攻陷高州三月饒州平五月金軍破東
京擒高永昌七月春州渤海叛尋降

續通考遼太祖嘗親征渤海大諲誤拔夫餘府
誅其守將遂圍忽汗攻破其城詔以兵衛諲誤
及族屬以出改渤海為東丹忽汗城為天福冊
皇子貝為人皇王以居之衛送大諲誤於皇都
西城名諲誤曰烏爾古

舊作烏魯
古今改

妻曰阿勒扎

舊作阿里
古今改

改夫餘府為黃龍府世為遼重鎮

遼史營衛志太祖宏義宮以心腹之衛置益以
渤海戶永興宮以太祖平渤海俘戶等置敦睦
宮以渤海建藩巖三州戶置

遼史兵衛志天顯元年滅渤海國國地方五千里
兵數十萬五京十五府六十二州盡有其衆契
丹益大遼國兵制詔諸道徵兵惟南北奚王東
京渤海兵馬雖奉詔未敢發兵必以聞上遣大
將持金魚符合然後行遼東為渤海故國太祖

以其地建南京遼陽府統縣六轄軍府州城二十六有丁四萬一千四百

遼史地理志太祖東併渤海得城邑之居百有三東京道遼陽府本朝鮮之地後為渤海大氏所有併吞海北地方五千里兵數十萬

金

金史粟末靺鞨始附高麗姓大氏李勣破高麗粟末靺鞨保東牟山後為渤海稱王傳十餘世

有五京十五府六十二州太祖二年執寧江州

渤海大嘉努次扎錫

舊作札只今改

水遇渤海軍攻我

左翼七穆昆

舊作謀克今改

衆少却敵兵直犯中軍太

祖射耶律色錫

舊作謝十今改

死敵大奔十月召渤海

梁福烏達

舊作幹答刺今改

使偽亡去乃招諭其鄉人

曰女真渤海本同一家我興師伐罪不濫及無

辜也收國二年詔渤海諸部官民已降或為軍

所俘獲逃遁而還者勿以為罪其酋長仍官之

且使從宜居處太宗天會四年命貝勒

舊作字董今改

大臭以所領渤海軍八明安

舊作猛安今改

為萬戶

松漠紀聞渤海國去燕京及女真所都皆千五
百里以石壘城脚東並海其王以大為姓右姓
曰高張楊寶烏李不過數種部曲奴婢無姓皆
從其主男子多智謀驍勇他出國右至有三人
渤海當一虎之語契丹太祖滅其王大誣謬徙
其名帳千餘戶于燕給以田疇蠲其賦入往來

貿易關市皆不征有戰則用為前驅天祚之亂聚族立姓大者於舊國為王金人討之軍未至其貴族高氏棄家來降言其虛實城遂陷契丹所遷民益蕃至五千餘戶勝兵可三萬金人慮其難制頻年轉戍山東每徙不過數百家至辛酉歲盡驅以行其居渤海故地者仍契丹舊為東京置留守有蘇扶等州蘇與中國青州登州相直契丹東丹王封於此處蘇乘筏浮海歸後

唐

遼東行部誌瀋州在唐時嘗為高麗侵據唐季不能勤遠為大氏所有傳國十餘世當五代時契丹與渤海血戰數十年竟滅其國于是遼東之地盡入于遼

謹案渤海處黑水靺鞨之南實靺鞨之粟末部也南併百濟北兼黑水幅員五千里在東方最為大國大氏自唐則天時建國迄于後唐歷二

百餘年官府制度燦然大備其世次傳受及使命往來史皆詳述惟是遼紀稱天顯元年太祖破忽汗城獲王大諲譔遂併其地改渤海為東丹國而諸書皆云取夫餘一城以封托雲太祖既崩渤海王復攻夫餘不能克似諲譔尚在而宋太宗時有賜渤海瑛府王之詔徽宗時登州有置戍巡防渤海之奏似其國至北宗末猶存考之薛史及冊府元龜諲譔既俘統兵攻夫餘

城者為王之弟即遼紀所載渤海諸州為遼攻
得者惟忽汗城及西南二京南京止南海一府
西京未得者尚有東平安遠等六府其東北之境並未
屬遼即長嶺南海鄭誦定理諸府亦屢平屢叛聖宗十
四年紀云渤海侵鐵驪遣奚王討之不能克二十一年
紀云渤海來貢是忽汗破後壤地與遼相接者雖已入
遼而國人收合餘部別自立王故五代史宋史宋會要
通鑑通考皆謂止取夫餘一城也冊府元龜又有後

唐遣人送渤海王憲歸國之文憲必王之子弟
留中國者長興清泰間使命往來則仍世君其
國可知第為遼所隔石晉又臣遼遂不復至耳
至五京十五府六十二州之名詳見新唐書而
州止六十考遼志東京道有崇集麓三州皆渤
海置而唐書止載益州蓋本高麗之蓋牟城在
今蓋平境益州為率賓故地實係二州則渤海
州名固不止六十有二矣遼史又云唐元和時

渤海王大仁秀南定新羅北略諸部開置郡邑
其見於志者若龍河會農吉理杉盧沸流鐵利
安定銅山安寧諸郡若銀州之改為富州蓋州
之改為辰州皆唐書所未及也王都忽汗城因
河得名以地理及音譯考之當即今呼爾哈河
河源出吉林烏拉界會畢爾騰湖東流經故會
寧城北又九十餘里繞寧古塔城南北流七百
里入混同江唐書云渤海上京在忽汗河之東

為肅慎故地新唐志云自安東都護府經蓋牟城又經渤海長嶺府千五百里至渤海王城城臨忽汗海其西南三十里有古肅慎城又曰自神州陸行四百里至顯州又正北如東四百里至渤海王城明一統志亦言金滅遼設都于渤海上京是忽汗城實與古肅慎城金會寧城相近俱在今寧古塔境其北即黑水境遼史以遼陽當之失之遠矣其餘府州多在今吉林烏拉

寧古塔及朝鮮界

並詳後疆域門

遼既未能全併渤海

以所俘獲散置他處多取渤海州邑之名以名之亦猶黔漳嚴廣蘇潤松江諸州之在遼耳又若大延琳之志恢宗國烏元明之守節不降割據頻興迄於天祚之世金太祖以本屬一家遣人招諭松漠紀聞謂智謀驍勇出他國右至有三人渤海當一虎之語不信然哉

欽定滿洲源流考卷六

欽定四庫全書

欽定滿洲源流考卷七

部族七

完顏

五代

金史世紀金之先出靺鞨

另條見前

氏古肅慎

另條見前

地也五代時附屬於契丹在南者籍契丹曰熟

女真在北者不在契丹籍號生女真

按滿洲語稱初

所屬曰佛滿珠謂舊滿洲也新附編入旗分者
曰伊徹滿珠謂新滿洲也此所云生熟蓋即新

舊之
意
生女真地有混同江長白山所謂白山黑

水也金之始祖諱哈富

舊作初從高麗來
按通

大金國志皆云本自新羅來姓完顏氏考新羅

與高麗舊地相錯遼金史中往往二國互稱不

為分別以史傳按之新羅王金姓相傳數十世

則金之自新羅來無疑建國之名亦應取此金

史地理志乃云以國有金水源
居完顏部布爾

為名史家附會之詞未足憑耳

噶

滿洲語叢柳也舊作僕今改正

水之涯生二男長曰烏嚕

舊作
次曰幹魯遂為完顏部人至獻祖徙居海

古勒

蒙古語行軍殿後也
舊作海古今改正

水耕墾樹藝始築室

有棟宇之制自此遂定居于阿勒楚喀水之側

矣

按金史云國言金曰安出虎以安出虎水源
于此故名金源考滿洲語稱金曰愛新與安

出虎音不相涉大金國志亦祇言國產金及有
金水源其以安出虎為金蓋作史者強加附會
猶黑水掬之微黑鴨淥江色若鴨頭之論耳金
自始祖四遷至此後為上京故地實與今阿勒
楚喀拉林河源相近詳見下疆域門

六世至景祖稍役屬諸部修

弓矢脩器械前後願附者衆鄂敏

舊作
幹泥

水富察

舊作
蒲察

部特克新特布

舊作泰
神忒保

水完顏部圖們

舊作

統門按國們江在今寧古塔城南六百里源出長白山

水完特赫

舊作溫地痕

部舍音

舊作神隱

水完顏部

按此二完顏部蓋族姓之散居者

皆相

繼來附

大金國志金國本名珠里真

謹按本朝舊稱滿珠所屬曰珠申

與珠里真音相近但微有緩急之異是皆肅慎之轉音也

後訛為女真或曰

慮真肅慎氏之後渤海

另條見前

之別族也唐貞觀

中靺鞨來中國始聞女真之名

按通考云五代時始稱女真據

此則唐時已有是稱矣

世居混同江之東長白山下南隣

高麗北接室韋西界渤海東瀕海三國志所謂

挹婁

另條見前

元魏所謂勿吉

另條見前

唐所謂黑水靺

鞨者今其地也其屬分六部有黑水契丹目為混

同江

按混同即松阿哩江雖下流與黑龍江會實係二水此合為一亦誤

居江之

南者謂之熟女真以其屬契丹也江之北為生

女真亦有受宣命號太師者契丹自賓州混同

江北八十里建寨以守之契丹恐女真為患誘

豪右數千家處之遼陽之南使不得與本國往

來謂之哈斯罕

滿洲語藩籬也志云不得與本國往來寔有防閑之義舊作合

蘓欵又作曷東北分界入山谷至凍沫江

按凍沫即

混同而志並稱蓋誤以混同為黑龍江也

中間所居之女真隸咸州

兵馬司謂之輝發

舊作回霸亦作回拔築咸州在今威遠英叢門之間東北

至松阿哩江約六七百里今有輝發河國初尼瑪察部人旺吉努于河邊築城以居因號輝

發國蓋猶沿其稱也極遠而野居者謂之黃頭女真又居

凍沫江之北寧江州之東地方千餘里戶十餘

萬族帳散居山谷無國名自推豪傑為長小者

千戶大者數千戶蓋七十二部落之一也或云

金祖本新羅人號完顏氏傳至太祖以其國產

金及有金水源故稱大金

按志但言有金水源未嘗以安出虎為金

考金源之稱始於遼中京有金源縣以地有金句為名金元並因之在今喀喇沁右翼地則金源之稱固與安出虎無涉且金本紀載太祖建國之詔曰肅鐵雖堅終亦變壞惟金不變于是國號大金是併未嘗因水取名矣

通考女真蓋古肅慎氏五代時始稱女真後避契丹主宗真諱更為女直俗訛為女質按巴堅

舊作阿保機 吞北方三十六國此其一也

遼

通考按巴堅遷女真豪右數千家於遼陽南而著籍焉謂之哈斯罕哈斯罕者熟女真也隸咸州兵馬司者謂之輝發輝發者非熟女真亦非生女真也自涑沫江之北寧江之東地方千餘里戶十餘萬無大君長亦無國名小者千戶大者數千則謂之生女真宋建隆後屢遣使來淳

化時契丹伐女真女真衆纔萬人而弓矢精勁
又為灰城以水淋之為堅冰不可上距城三百
里燔其積聚設伏於山林間契丹既不能攻城
野無所取遂引騎去大為山林之兵掩襲殺戮
大中祥符三年契丹征高麗道由女真女真復
與高麗合兵拒之契丹大敗而還自天聖後屬
契丹世襲節度使兄弟相傳其帥本新羅
另條見前
人號完顏氏女真服其練事以首領推之自哈

富

解見前此又作龕福今併改按此所載諸名與金史異同者頗多今俱從金史改正仍注

原文於下後同以下班班可紀哈富生烏嚕舊作烏嚕訛魯

生雅哈

舊作洋海

雅哈生蘓赫

舊作隨潤

蘓赫生實魯寔

魯生呼蘭

舊作胡來

呼蘭三子伯曰和勒博

舊作核里頗

叔曰富勒蘓

舊作蒲剌束

季曰伊克

舊作楊割

伊克聚族

帳最多謂之伊克太師能用其人遂稱強諸部

賦歛調發刻箭為號事急者三刻之粟粥燔肉

為食上下無異品和勒博四子長曰烏魯斯舊作

英制

次太祖次太宗次曰賽音

舊作撒也

永昌八年

秋太祖盡得遼東長春兩路始稱皇帝建元天

輔改國號大金

契丹國志女真國乃肅慎故區也地方數千里

戶口萬餘無大君長立首領分主部落地饒山

林契丹於長春路置東北統軍司黃龍府置兵

馬都部署司咸州置詳究

舊作詳穩

司分隸之黃頭

女真皆山居號哈斯

案此又合二部為一蓋契丹志為葉隆禮所撰傳聞

之詞未得其真也

其人勇鷙契丹每出戰皆被以重札

令前驅

契丹國志東南五節度熟女真部族共一萬餘戶皆處山林尤精弋獵其地南北七百餘里東西四百里西北至東京五百餘里又次東南至熟女真國其地東西八百餘里南北千餘里居民皆處山林耕養屋宇與五節度同無首領統轄至東京二百餘里東北至生女真國居民屋

宇耕鑿言語衣裝與熟女真並同精於騎射前
後屢與契丹為患契丹亦設防備南北二千餘
里沿邊創築城堡屯守其南界西南至東京六
百里

遼史營衛志阿延

滿洲語尊大也
舊作奧衍今改

女真部聖宗

以女真戶置隸北府節度使屬西北路招討使
司戍鎮州境自北至河西部皆俘獲諸國之民
初隸諸官戶口蕃息置部訖於五國皆有節度

使伊德

舊作語有力也
舊作乙典今改

女真部聖宗以女真戶

置隸南府居高州北國外十部有長白山部

遼史兵衛志伊德女真部隸西南路招討司又

有東北路女真兵馬司又高州屬國軍有北女

真南京女真女真哈斯罕輝發

金

金史本紀收國元年正月壬申朔羣臣奉上尊

號是日即皇帝位上曰遼以賓鐵為號取其堅

也賓鐵雖堅終亦變壞惟金不變不壞金之色

白完顏部色尚白於是國號大金改元收國

集

開國以後具詳
金史茲不復載

大金國志女真靺鞨之後也其國在元魏齊周
之時稱勿吉至隋稱靺鞨地直長安東北六十
里東瀕海分為數十部有黑水白山等名後為
奚契丹所攻部族分散其居混同江之上者初
名女真乃黑水舊部

大金國志女真在契丹東北隅地饒山林國初之時族帳散居山谷地千餘里無城郭居止自後并遼得大遼全盛之地深入中原舉大江以北皆有之疆宇始廣矣

元

元史地理志開元路古肅慎之地隋唐曰黑水靺鞨後屬渤海渤海寢弱黑水復有其地即金祖之部落也元初立開元南京二萬戶府又設

軍民萬戶府五分領混同江南北之地

並見後疆域門

其居民皆碩達勒達

舊作水達達今改正

女真之人各仍

舊俗以射獵為業設官牧民隨俗而治

謹按金始祖本從新羅來號完顏氏所部稱完顏部新羅王金姓則金之遠派出於新羅所居有白山黑水南北之境二千里而遙固與

本朝肇興之地輪廣相同大金國志言金國本名珠里真與

本朝舊稱所屬曰珠申相近實卽肅慎之轉音也
五代以後盡得靺鞨舊部於是女真之名始著
考之遼史有繫籍不繫籍之分繫籍者惟遷居
遼陽之南數千家所謂哈斯罕大王不繫籍者
亦間有節度太師之號所謂長白山太師輝發
部太師是也金景祖亦曾受遼太師之稱而終
不肯受印繫籍遼人於邊境南北距千二百里
築城置戍益其震懾兵威者至矣自始祖八世

十帝遂至太祖應運造邦滅遼臣宋迹其初起
衆未滿千洵由山川鍾毓騎射精嫻故能所向
無前光啟方夏也奇功偉績具詳金史茲錄其
開國時舊部分合之由而完顏氏之隸籍八旗
者具載姓氏通譜至若上京及呼爾哈海蘭諸
路建置之詳則別載於後疆域門云

建州

唐

新唐書渤海傳率賓故地為率賓府領華蓋建

三州

按建州之名始見於此考率賓故地在今吉林烏拉境遼地理志云康州世宗遷率

賓人

戶置所屬有率賓縣志云本渤海率賓府

地考

遼康州及率賓縣俱屬顯州為渤海顯德

府地

在今廣寧境當亦遼率賓人戶所置非故

府地

蓋遼志固別有率賓府在洮州定理之間

也

又鴨綠江本名益州江則益州亦去長白不

遼

渤海建州固與國初所統之地相近矣

遼

遼史營衛志孝文皇太弟敦睦宮以渤海

另條見前

建瀋嚴三州戶置屬州三建瀋嚴

按此為建州移于西北之

始志云以三州戶置明非渤海建州之舊率屬
故地在遼為東京此屬中京遼史所謂在靈河
之南者
是也

遼史地理志中京道興中府本號霸州彰武軍

節度制置建霸宜錦白川等五州建州保靜軍

節度使唐武德中置昌樂縣太祖完葺故壘置

州
按此云置不言仍渤海之舊其非率賔故地明矣漢乾祐元年石晉

太后詣世宗求於漢城側耕墾自贍許於建州

南四十里給地五十頃州在靈河之南
按靈河以元一

統志考之
當卽凌河

屢遭水害聖宗遷於河北唐崇州故

地初屬武寧軍隸永興宮後屬敦睦宮統縣二

永霸永康

按此則建州再移於遼聖宗時其在
靈河之南者遼初所置州城是也在

靈河之北者

自聖宗以後至金元相承不改考

大清一統志在今喀喇沁及土默特地故城

在土默特右翼西南一百二十里周二里
餘四門與喀喇沁左翼毗連明屬三衛

契丹國志節鎮三十三處有建州

金

金史地理志建州保靖軍刺史遼初名軍曰武

寧後更今名金因之領縣一永霸

唐昌黎縣地

大金國志刺史七十五處有建州

按金承遼舊非渤海建州

故地也

元

元史地理志大寧路唐初屬營州貞觀中置饒

樂郡遼為中京大定府金因之元初為北京路

總管府領川建等十州元至元七年改北京為

大寧仍領川建等州

按元承遼金之舊非明時之建州也

元一統志金上京城古肅慎

另條見前

氏地按圖冊

所載京之南曰建州京之西曰賓州又西曰黃

龍府北曰肇州府之東曰永州曰昌州延州東

北曰呢嚕干城皆渤海遼金所置州縣並廢城

址猶存海蘭河經故建州東南一千里入於海

混同江北流經故建州五十里會諸水東北流

經故上京下達五國頭城

按此所云故建州蓋渤海之舊在金上京

之南者金之上京自開元東抵寧古塔自長白山抵阿勒楚喀幅員甚廣考金地理志云上京山

有長白青嶺水有阿勒楚喀混同江拉林河皆
在今吉林境又云東至呼爾喀路六百三十里
西至肇州五百五十里東南至海蘭路一千八
百里呼爾哈河在寧古塔城旁海蘭河在寧古
塔城南四百十里據四至以求其中則金上京
正在今吉林城東北阿爾楚哈阿旁而渤海之
建州東去松花江北流之所五十里東南去海
蘭河一千里亦在吉林境明初土人猶沿舊稱
耳又按大清一統志海蘭河有五皆在寧古
塔吉林境內一入呼爾哈河三入混同江皆去
海遠惟在寧古塔城南四百一十里源出無名
山者東流會布爾哈圖河入海元志所云海蘭
應即指此也並詳
後疆域及山川門

元一統志確甯河在大寧路金源縣西東南入

建州境合於靈河凌河在大寧路興中州源出
龍山縣經本州下流達建州境大凌河自建州
界流經興中州東南下流入義州境凌水在大
寧府建州南五里自富庶縣流至本境四十里
入興中界一云發源龍山縣南八十里東北流
百里入利州界又北經富庶縣東南三十里入

建州境

按此所云建州蓋元時大寧所領即遼
時以渤海建州人戶移置者在凌河南

者故城在錦縣西北在凌河北者故城在上默
特右翼西南皆非渤海之舊也金源龍山富庶

並元大寧路屬縣今
屬喀喇沁土默特界

明實錄永樂二年置建州衛十年置建州左衛

宣德七年置建州右衛

謹按建州為

本朝岐邠故地州置於渤海本在今吉林境至遼
時一移於凌河之南再移於凌河之北金元相
承置節度刺史而建州遂在今錦州邊外喀喇
沁土默特之間大抵東土州郡之名多始於渤

海而移於遼遼志所載襲渤海之名而易其地者十居七八如率賓府遼遷其人口於今廣寧謂之率賓縣而其故地仍有率賓府在洮州定理之間洮州以洮沫江名定理府據一統志為興京而率賓府與之相連則所領之建州寔即國初所統之建州也以元一統志考之其祇稱建州者屬興中府在凌河南北為遼金所置明屬烏梁海其稱故建州者近混同江北流之所即

渤海所置是州雖已移而故地相傳舊稱尚在
明初因以名衛耳迨我

肇祖原皇帝始居赫圖阿拉是為

興京寔右衛之地舊邦

新命王迹

肇基恢天作之

鴻模啟億年之

景運嗣後若棟鄂哲陳蘓完及海西之烏拉哈達輝發

葉赫長白山之訥殷珠舍哩以至瓦爾喀呼爾
哈黑龍江諸部並入版圖東極使犬諾羅諸部

罔不率先臣服

東京

盛京以次

締創

出震

乘乾有開必先矣

附金史姓氏考

按金史所載姓氏均與滿洲氏族相合第譯對字訛今悉據八旗姓氏通譜改正仍依百官志所載

序次如左

完顏

金始祖自新羅來居完顏部因以為氏

溫特赫

舊作溫廸罕今改正史云圖們江水溫赫特部景祖時來附

瓜爾佳

舊作夾谷

布薩

舊作僕散

珠格

舊作木虎又作準葛今併改

伊勒圖

舊作移刺答

沃呼

舊作幹勤

旺札卜

舊作幹準把

阿布哈

舊作阿不罕

珠魯

舊作卓魯

輝特

舊作回特

輝罕

舊作黑罕

輝羅

舊作會蘭

徹木袞

舊作沉谷

賽密呼

舊作塞蒲里

烏克遜

舊作烏古孫

舒爾都

舊作石敦

卓特

舊作卓陀

烏蘓占

舊作阿爾準

博提斯

舊作匹獨思

博爾濟克

舊作潘術古

烏實拉

舊作暗石刺

舒古蘓

舊作石古若

珠爾罕

舊作綴罕

光嘉喇

舊作光吉刺

以上皆封金源郡

費摩

舊作裴滿

圖克坦

舊作徒丹

溫都

舊作溫敦

烏凌阿 舊作兀林答

阿克占 舊作阿典

赫舍哩 舊作訖石烈

納喇 舊作納蘭

富珠哩 舊作字木魯

珠勒根 舊作阿勒根

納哈塔 舊作納合

實嘉 舊作石蓋

布希

舊作蒲鮮

瓜爾佳

舊作古里甲

阿達

舊作阿迭

尼瑪蘭

舊作聶摸樂

穆延

舊作抹拏

納塔

舊作納坦

烏蘇

舊作兀撒惹

烏新

舊作阿鮮

拜格

舊作把古

溫都遜

舊作溫古孫

諾延

舊作釋益

色赫哩

舊作撒合烈

烏色

舊作五塞

哈薩喇

舊作和連嘉

納雅

舊作能偃

阿里

从原文

巴爾

舊作班兀里

尼沙

舊作聶散

富色里

舊作蒲連烈

以上皆封康平郡

烏庫里

舊作烏古論

烏雅

舊作兀顏

鈕祜祿

舊作女奚烈

通吉

舊作獨吉

洪果

舊作黃捫

延札

舊作顏蓋

博和

哩 舊作蒲古里

必喇

舊作必蘭

幹哩

舊作幹雷

都克塔

舊作獨昂

尼瑪哈

舊作尼龐窩又作尼龐古今併改

托羅特

舊作拓特

赫舒

舊作合散

沙達喇

舊作撒答牙

阿蘓

舊作阿速

薩察

舊作撒剌

卓多穆

舊作準土谷

納木都魯

舊作納諸魯

雅蘓貝

舊作業速布

額蘓哩

舊作安煦烈

愛新

舊作愛中

納克 舊作拿可

古勒渾 舊作貴益昆

幹色 舊作溫撒

索歡 舊作梭罕

呼雅 舊作霍域 以上皆封隴西郡

唐古 舊作唐括又作同古今併改

富察 舊作蒲察

珠嘉 舊作木甲

蒙古

以原文又作蒙刮亦作蒙括今併改

伯蘓

舊作蒲速

鄂屯

舊作奧屯

錫默

舊作斜外

愛滿

舊作詣蠻

都克塔哩

舊作獨虎朮魯

摩年

舊作磨輦

伊年

舊作益輦

托諾 舊作帖暖

蘓伯林 舊作蘓字輦 以上皆封彭城郡

欽定滿洲源流考卷七